

四庫全書

集部

欽定四庫全書

集部

石倉歷代詩選卷

四百九十九
五百

詳校官右中允臣薩敏

侍讀臣孫球覆勘

總校官進士臣朱 鈐

校對官中書臣方大川

謄錄監生臣張元功

欽定四庫全書

石倉歷代詩選卷四百九十九

明 曹學佺 編

明詩次集一百三十三

文彭

贈徐子仁

金陵帝王居佳氣鬱以蒼幽人無外慕遯迹含其章結
廬城之南謝喧聊尚羊鳥鳴青松下塵揮白門傍芳蘭

轉光風蕙帳霏芸香纖鱗時泳躍翠羽恣翱翔對此志
利達目澹心彌良身逢明盛時雅志差巖廊默坐草太
玄高卧同羲皇朗咏太冲篇遠慕淮南王至理已云得
壽考日以強逍遙塵寰中此樂殊未央

仲春履吉與之永之小集得草字

二月集嘉賓駘蕩春光早白日墮游絲黃鳥鳴聲好玄言互剖
析至理窮探討觥籌雜笑歡高懷自傾倒落霞尚遲留初月出
杲杲雖無陳遵投亦有魏公掃相期終南山去拾金光草

侍顧華玉丈上方玩月

晨策入石湖落景憩上方上方連巘崿疊嶂通河梁窈
窕入深谷崎嶇陟崇岡秋深氣蕭瑟雲薄天蒼涼萬木
振長風羣卉彫嚴霜遐觀詣夙心周覽窮八荒徑仄步
逶迤崖傾身低昂緣葛采石華捫蘿拾蘭芳矯首睇飛
鴻俯視空微茫皇皇殿閣森霏霏鵲霧黃望望皓首白
耿耿銀河光坐久涼飈集泣露沾衣裳佳會合章縫友
朋亦孔良綠醕何淋漓各舉浮白觴自憐骯髒骨零落

同高陽邂逅山公醉容我襴衡狂山水能娛人為樂殊未央
夜靜心益閒天籟雜鳴鑿安得孫登徒長嘯和鸛鳴皇
何如王子晉緱山吹笙簧懷哉鵠夷子功成謝巖廊眷
言仰前脩千載永相望

石子岡望江

長江望不極劃然射雙眸風帆迅飛鳥却逐東逝流落
霞照寒影爽氣生清秋羈懷三十日何如此日遊

茅山

盤迴繞山足望望山之椒丹厓出殿角落日風蕭蕭時
聞金磬聲還向空中飄聞寂無來踪慮澹塵彌消閒庭
候月出長松生夜濤

廷試述懷

少小習章句朝夕親筆研詞場十度遊終迷五色線行
行預計偕迢迢入畿甸皇畿本佳麗瑞靄鬱蔥蒨五城
十二樓紫陌韶華徧披褐朝至尊複道隨羣彥步趨白
玉階日射黃金殿螭頭繞爐煙雉尾開宮扇操筆陳蕪

詞來上宸旒獻雖非仲舒策不待常何薦但願納芻蕘
自忘草茅賤

贈沈山人

一見出世入澹然忘物累閒談山水勝真得煙霞趣蕭
然隨去住所至興自寓嗟我濁世姿何由悟三昧

黎惟敬小集得霜字

衡陽轉參畢玉露將為霜涼風起天末肅肅吹衣裳欣
此良宴會蹲舞羅酒漿感時懷隱憂仰睇雪飛揚

徽州吳君得妙法製墨賦詩贈之

新安松枝燒不絕紅霞碧燄相糾結收煙調搗三萬杵
練作玄霜烏玉玦設來几案對端侯雲浮烟散光騰徹
落紙三年不昏暗一點霜紈漆無別廷珪已矣潘谷死
此道只今誰得比水晶宮客汪廷器吳郎繼之真二美
時時贈我兩三丸光黑異常心獨喜日日用之無間斷
經歲方能半寸毀黃金可得奈墨無莫輕目前惟重耳
嗟余不欲磨世人願得一笑臨池水

送王祿之會試得姑字

我聞蓬萊之山乃在碧海之東隅雲霞五色成虛無玲
瓏窻隙翠羽鋪中有玉臺金樹紛紫敷曲房阿室木雞
珊瑚青苔紫芝石髓菖蒲仙人來止多歡娛逍遙羽服
何蘧蘧又聞金華東觀乃在西北之上京台階清切稱
天衢彤樓紺殿黃金扉玉墀丹陛羣公趨王郎真是天
上手提一顆明珠秋風別我獻天子自謂駿馬今
應圖看君意氣橫秋空扶搖九萬誰能拘瞻依日月光

沐浴皇恩殊此時不羨王子高乘雲跨鶴飛雙鳬王郎
王郎眞丈夫功名唾手如轉轡始聞奮翮自白下復道
朝天入帝都帝都遙遙三千里惜別誰忍歌驪駒殷勤
把袂重致詞且爲王郎立斯須相看已有雲泥隔此身
那得同馳驅君今已立白玉堂如入員嶠登方壺我今
棲遲原憲貧亦是殮精鍊液之仙姝撫心茫茫淚如霰
望君去去不可呼望君去去不可呼願解腰間金僕姑

玉陽仙選壽茶甫

玉陽之山雲英英玉女祠前春水浣仙人騎鹿過東海
相邀服食脩長生嘈嘈笙鶴來雲駢蔡經初見王方平
有時月底聞歌聲分明馭氣遊蓬瀛人生此樂真自得
百年去去隨虛盈富貴囂然直可輕有才不用空浮名
即今甲子已一週巖壑放浪無逢迎君扳玉樹肯相待
我欲從君禮太清

壽郡伯胡公廼翁八表

君不見西華之山凌碧虛鍾靈毓秀神仙居盤礴日月

枕扶輿廣平方成委丹廬黃苓紫芝無處無青鳥白鶴
時相呼金燈交錯如珊瑚懸崖窈窕通蓬壺我聞維嶽
降甫中山靈集聚多奇珍異人往往乘時出飄飄不縛
寰中塵道高德劭常轡軻媿殺腐鼠羞鷄雛豈無勲業
動當世不勞政事耽文儒歸来自理山中屋整頓松筠
友麋鹿有時長嘯學蘇門一似陶潛愛薜蘿三十年餘
變髣髴閉門不問黃金闕讀書養性還灌園山中四時
知歲月上友安期浮丘公下揖子晉葛仙翁瓊裾玉舄

氣瀟灑手揮如意談玄空百年去去即常生服食不須
毛骨輕南極耿耿垂明星西望佳氣擁州城綵衣迢迢
阻江麓養志至今食君祿高堂不得試兒啼霞觴遙進
杯中醪吳門有士卧空谷為君高歌鶴南曲

立春日同彭孔嘉過袁與之桃花別墅

愛爾桃花塢臨溪新草堂煙籠寒篠翠風轉野梅香積
雪留殘白垂楊試淺黃山公行樂地時許野人狂

其二

春日尋幽賞行行路轉迷忽驚高柳變似聽早鶯啼翠
桁依危時紅橋度淺堤即看新水滿疑入武陵溪

雨中懷段戶部兄弟

久雨惟饒睡高樓苦憶君遙憐前夜月只隔一溪雲碧
映船窻水香焚綺幕云有懷吟不就空自惜離羣

王繩武同遊長干寺

寶剎長干外登登紫蔓長曲池懸玉澗幽徑落天香旭
日搖金塔纖雲擁畫廊偶同王子敬看竹到山房

人日竹堂看梅

今年春色早人日見梅花香入禪房靜影隨初月斜折
來烏几亂看去白雲賒東閣無由到詩成惠遠家

舟中與顧貞叔夜話

燭短光猶白茶傾火尚紅論心聽夜雨把袂怯春風浩
浩江湖濶茫茫宇宙空茆山明月上羨殺葛仙翁

訪雪次施侍御韻為袁邦正賦

為發山陰興須烹掃雪茶玄談消世慮淑氣動春華玉

漏香沈燼青燈夜吐花孤吟成底事句穩足生涯

訪顧子諫龍石山居

愛爾村居好幽栖興不窮晚煙凝樹白霜葉映山紅飯
煮香杭稻茶烹顧渚風明朝向城市不必念泥鴻

夜宴子諫書齋啓窻見月喜而再賦

徑僻無人到柴門夜不關清樽開綠醕白月掛青山室
靜心逾妙香銷意亦閒無論去與住且復破愁顏

春寒

臘盡期春至春來寒更隆凝雲初漏日舞雪又旋空慘
慘陰生澗重重箔護梅花消息近應只在墻東

柱山

滄海浩無極空濛混太清寒潮初拍岸涼月已生明煙
霧虛塵界星河動玉京三山真可接知有列仙行

泊儀真

落日不可渡孤雲天際浮乘潮辭白下卷幔入真州水
氣生江霧星光宿斗牛此身何物似天地一虛舟

同王繩武彭孔加王子卿袁氏四弟兄及嘉臺
二弟登上方

一春常畏雨勝賞及時須昨對雲巖月今開寶積壺飛
花隨急盡落日動明湖未得殮霞法王喬何處呼

席上贈祥上

太平猶未到已見石嶙峋落日照梵宇秋風吹葛巾賓
朋多曠達雲物任鮮新麗藻逢支遁吾儕媿許詢

沈工部桃花書屋

君住桃花塢何如鄭子眞應同潘岳縣非是武陵民香
散餘書帙花飛襯舞茵十分春色好劉阮問迷津

江

不見長江險寧知天地浮金焦當萬壑日月盪中流波
浪潛蛟室雲霞結蜃樓乘槎吾有興直欲犯牽牛

金陵

此日帝城遊風烟入望愁青山映黃屋綠水浸紅樓高
樹宮牆繞新波太液流雨花臺上望無處不宜秋

春日東郊訪盧文厚

春日東郊外風光事事新
杏花紅欲破柳色綠初勻
野水侵溪岼輕風起陌塵
數椽茅屋底愛爾獨安貧

王希堯自瓜州過訪

忽爾辭京口翻然訪敝廬
寒雲殘臘盡落月夜窻虛
世事惟看鏡生涯好著書
扁舟楊子渡悵望獨愁余

次韻答李太史

曾試山中茗無如雨後泉
浮花凝白乳然竹散青煙禪

榻論文細虛堂晤語玄何當謝塵鞅來結碧山緣

題南橋范子潤園亭

仲夏園林好薄陰煙樹重孤花猶灼灼一鳥鳴嚶嚶幽
徑抽新竹清風奏古松新茶煮初熟有客忽過從

虎丘別諸親友

風日虎丘好諸親送我時殷勤一杯酒已作隔年期身
為浮名累心猶故國思他鄉見花柳折得寄憑誰

蓮花寺看桃花

貧賤出門難那知花事闌已愁連日雨更怯暮春寒野
寺雖牢落天桃尚未殘偶然乘興過隨喜一回看

泊舟八里灣

久旱苦無水維舟八里灣風生沙撲面霞起日沈山深
夜聞愁語侵晨候啓關從來知世路美殺白鷗閒

送朱子价

辭家是三月楊柳正依依忽爾歲云暮燕山朔雪飛已
驚物候改况復故人歸獨坐不成寐時時歌式微

人日雪晴答徐相公

人日雪初晴朝暾映雪明已占吾道泰更喜物華清
霽景融金殿陽和布玉京共知調燮在四海荷昇平

雪晴同呂舍人顧汝所南郊閒步

京華春色好最是雪晴時樹凍初含潤溝冰欲動澌
風生塵冉冉日下景遲遲攜手南郊去仙家賸酒卮

旅泊

旅泊頻驚夢孤村獨繫舟雨餘新漲滿日落晚風柔為

客經年過歸程計日酬一杯聊自遣沙上有眠鷗

夜讌朱子价園池

清讌開池上輕風吹樹枝已憐秋氣好正是月明時玉
露沾衣重金尊送酒遲平生好客興為我更忘疲

中秋遇雨宿江中

本擬中秋夜家庭待月圓蹉跎靈雨裏猶自滯愁邊海
氣隨潮上江聲入枕懸夢回天未曙起坐不成眠

人日立春

佳辰愛人日况復立春時節喜三陽至羹傳七菜宜未
吟高適句且賦道衡詩莫謂家鄉近終成兩地思

過精嚴僧舍

人日過禪寺言脩淨業緣鳥鳴簷樹簇雲護佛燈圓佳
節尋僧遣新詩洗研傳往來惟寄跡即此悟真詮

宿雲堂山樓

舊日西湖徑梅花幾度開甃拋塵外事乘興雨中來佛
國圓青嶂禪房鎖綠苔一宵清淨業浩劫自輪迴

登巖山

夙慕山陰勝千峯列翠屏探奇窺禹穴讀記想蘭亭俯
仰悲今昔煙霞本性靈空餘巖山廟誰寫換鵝經

龍泉山

曉色姚江上青山逐霧開輕風吹竹樹初日映樓臺春
到花爭發潮平水自迴莫言行役苦勝景且徘徊

連日奔走塵冗懷抱欠佳偶過顧舍人汝由研山
齋其窻明几淨折松枝梅花作供鑿玉河冰烹

茗啜之又得鳬舄奇古目所未見灸內府龍涎
香恍在世外不復知有京華塵土賦此紀興

偶入高人室恍然塵夢醒香生金鴨火茶剖玉河冰簷
際鳴幽鳥窻間出凍蠅春光遽如許萬慮一時增

會臺鄆城故墟齊魯會盟處有子建讀書臺

齊魯多奇跡鄆城會有臺當年空戰伐此日已蒿萊子
建不可作齊桓安在哉悠然會心處選勝草堂開

宿通州靖嘉寺

古寺荒煙合巍然三殿存迴廊餘磴石曲逕滿苔痕歲
久累愚暗庭閒鳥雀喧獨憐車馬客一宿戀空門

平谷道中

捧檄趨平谷西風送馬蹄秋深衰柳變日落晚山低荒
草平原合黃雲入望迷邊城烽火息野老自提携

九日遊石湖次白二貞夫韻

重陽誰泛石湖船秋水平吞萬里天翠管銀笙空外沸
牙檣錦纜鏡中牽西風着意吹烏帽紅葉如花落舞筵

痛飲狂歌非慢世江山佳節自年年

丹陽道中同嘉弟

昨夜乘潮發建康今朝潮落又丹陽
天南星斗隨沙鳥江上風煙憶故鄉
去住此身原不定飄零吾道孰行藏
同舟爾亦同淪落對酒無言淚兩行

道中望上宮

策蹇行行路轉深上宮臺殿鬱森森
朱幡縹緲雲中影玉磬玲瓏雨外音
丹竈有時窺白鶴砂牀何日試黃金

我來欲訪茆君跡古洞雲封不可尋

湖上

開歲常懷湖上遊干戈阻絕未能酬
水光山色依然好紅葉青松不奈秋
驅寇曾聞當日喜漁歌猶有昔時愁
獨憐鷗鳥沙汀上來往翻飛得自由

初夏遊煙雨樓

郭外空濛煙雨樓飛甍巖嶭峙中流
三江形勝風濤轉萬井鶯花雉堞浮
此日雲中見鄉國何時天際有歸舟

停杯莫惜斜陽下新月纖纖映遠洲

遊鴛鴦湖示信項君

秀水亭前水荇香鴛鴦湖上浴鴛鴦
遠天簫鼓迎歌扇倒影樓臺浸女牆
華粲夷猶衝菡萏竹枝款乃和滄浪
莫言煩暑無由避月照波光玉露涼

樾徑

入門百本循牆樹六月曾教落翠陰
乍到只疑天竺國坐來元是比丘林
森森古殿丹青剝細細苔花錦繡侵

讀罷楞巖時縱步問關何處語幽禽

古栢

吳中昔有梁朝檜范相祠堂獅子林喬木只應占世澤
禪關時許坐鳴琴長廊野鶴巢香葉古殿丹青鎖翠陰
深夜蛟龍時一吼獨驚諸葛少陵心

拂水崖分得寒字

虞山西南太奇絕流泉迸出青崖湍橫分一道地脉裂
倒飛十丈天風寒注披射日金光草淨瀉孤雲白玉盤

洪厓華蓋渺何許此時直欲招青鸞

宿石門山

秋老山開錦繡紋石門清氣獨氤氲水深隱隱潛龍穴
巖峻時時過鹿羣芋栗未收看野燒松篁不整度秋雲
地虛疑有仙人宅笙鶴嘈嘈靜夜聞

黃山

江激寒濤殷曉雷黃山門下海潮迴清秋白晝蛟龍舞
翠壁丹崖錦繡開縹緲樓臺依日月虛無雲氣接蓬萊

天風何處飛黃鶴笑指王喬歸去來

聽濤

芙蓉江上水浮天夜夜寒潮到枕邊
春水扁舟思范蠡秋槎八月候張騫
風生蘆荻聲逾壯月照蒹葭興渺然
小築茆齋真勝絕分明杜甫浣花川

楚江秋泛為吳子賦

有客欲登黃鶴樓掛帆十月辭揚州
瀟湘月落洞庭晚巫峽猿啼雲夢秋
攬勝定尋赤壁壘浩歌常傍白蘋洲

杜陵李白風流在送爾扁舟汗漫遊

廣陵客懷

落日停橈古渡頭繁華人說是揚州
荒祠不見無雙樹錦纜空傳十丈舟
細雨入窻燈黯黯輕塵撲面思悠悠
功名何事翻成累轉憶當年馬少遊

玉蘭花次韻

玉花千隊映華筵勝賞須知異隔年
香透紗窻凝郁烈影搖庭月關嬋娟
歌停莫使空金罍賦就憑誰繫絳箋

若向楊州比瓊樹未應聲價讓渠專

宴董學士新堂

席上以碧桃為供

學士新堂切禁垣賞筵秩秩詠斯千
碧桃和露來天上
玉醴生香出大官
碁局往來隨勝負
投壺還激聲交歡
獨憐滄海將歸客
後會難期強自寬

洞庭山黛心灣

太湖波浪拍天浮
曾向東山爛熳遊
響水澗邊新濯足
莫釐峯上試開眸
金庭玉柱開三界
碧水丹山儼十洲

輸與幽人能擇勝，黛心灣上築高樓。

陸子虛園賞舞青霓牡丹

穀雨園林萬綠齊，名花驚見舞青霓。
朝霞麗日腥紅暎，返照迎風翠暈低。
繡幕參差香露滴，雕欄高下錦雲迷。
沈香亭上應如此，却笑清平漫品題。

人日祝京兆徐子九王履吉集停雲館得題字
今年人日春意動，梅花滿枝春草齊。
一聲鶯鷓送殘雪，萬里新水生湖堤。
粗糲強將佳客供，縹緗還許故人題。

難酬令節惟拚醉任性全身學馬蹄

九月八日登天平

翠壁丹崖劇可憐昔年曾酌白雲泉
重尋鳥道緣垂葛醉倚龍門嘯遠天
景物傷心秋色外樵歌滿耳落霞前
一杯強為諸山進明日重陽無酒錢

送袁補之會試兼簡永之

彙進誰憐貢禹心交期潦倒仲宣襟
長河風雪催行役上苑鶯花幾盞簪
海內弟兄三歲別天涯功業二毛侵

張儀自信猶存舌慷慨時歌梁父吟

二月一日大雪同孔加魯仲公瑕嘉弟遊虎丘
曲逕深埋短簿祠行行如失白蓮池高堂層疊銀成砌
古木斜橫玉壓枝弭害已占盈尺瑞陽春難和郢中詩
梅花不是違時候只待東風次第吹

暮春遊虎丘

卧石軒前草似茵劍池水滿碧粼粼浮圖麗日諸天迥
新綠敷陰萬樹勻不到一年如隔世尚餘三日是殘春

艱難莫問烽煙事濁酒隨時且慰人

師家開

水溢舟膠春晝明振衣隨步得閒行萬株楊柳綠堤古
一帶清泉觸石鳴無數青山圍秀色有時黃鳥度新聲
不堪沛北風塵路翻動江南行樂情

舟中見白燕

擊鼓開船遡上流行行日已近皇州點波白燕驚人眼
出樹青帘動客愁千里音書空入夢中宵月色又當頭

久拚世事蠅蝸外他日終師馬少遊

邢太史田錦衣集神樂觀

琳宮秋淨擁樓臺仙侶同遊院院開
白晝漫憑碁局遣清風時送酒杯來
高槐承日敷清蔭老栢飡霜蝕紫苔
回首又隨車馬足始知靈境少塵埃

是日約往南郊不果

南國清明花事稀燕山雨雪尚霏霏
長安九陌春何處旅食經年客未歸
兩地風光闕念切平生事業寸心違

也知空負城南約不是袁安不啓扉

五月新晴簡裔同僚

五月官衙樂事多綠陰清晝午風和茶烹雪乳新蘿峴
硯洗青花舊斧柯翠竹露梢舒嫩葉文魚依藻泳清波
一枰碁了人初散小小宣鑪藝水磨

題溪南別業

西溪溪水深不流溪南更築林堂幽會心自有濠濮想
乘興不數山陰舟一簾暮雨足吟眺萬疊春山供卧遊

主人方有蒼生寄惟餘清夢狎輕鷗

出德勝門見杏花

獨坐空齋感歲華春風日日捲黃沙
閉門無意窺楊柳出郭驚心見杏花
西望居庸開錦障北來天壽隱晴霞
驅馳莫問昌平道野寺蒼苔落日斜

是夜令人速王明佐不至至橋上更酌時沈山人寓園咫尺閉戶却寄二君

帝京車馬日駢闐此夜清遊更可憐
月色冰光相盪射

簫聲琴韻兩悠然王猷興盡乘舟返沈約愁多閉戶眠
勝境慚余能獨占為君還賦紫雲篇

送友人遊五嶽

五嶽名山天下奇擬從遐覽寄深思
幼輿丘壑真成癖宗炳神遊意已移
對月時從僧寺飲看花何必主人期
慚余未脫樊籠累羨爾飄飄任所之

送秦叅議之任

憶昔當年借榻時蕭條風雨繫深思
吳門別後心常念

燕市相逢喜可知王事有程多遠役旬宣無地不宜詩
携樽未得時相遇况又匆匆重別離

春興

帝里逢春春可憐五雲樓閣麗中天御溝花落冰漸盡
瓊島雲飛海日懸風度漢宮銀刻箭香生南陌翠花鈿
無由整醉金錢會零落東風又一年

七月廿一日集南郊鄭尚書園亭得城字

十畝芳園倚禁城初秋選勝集羣英柳條未墜霜前葉

池水新添雨後萍
濛濛會心真不遠
風塵飛夢此時清
振衣更有高臺望
無限江南萬里情

嘉弟久不見至

出門聞說是新春
寄得書來又未真
消息參差無可問
夢魂顛倒有時親
老年兄弟情偏重
薄命功命晚未伸
忽爾秋風又將至
時時翹首潞河津

林駙馬園亭賞紅蓮

主家留客敞華筵
一朵紅蓮倚檻鮮
太液分來知不遠

藥宮開處自天然，秋風入座生陰細。
曉日窺簾拂露圓，醉後不聞香滿坐。
銀箏翠管沸遙天。

平谷公署古槐

僻縣人稀早閉關，庭槐合抱挺蒼顏。
秋深已覺寒蟬盡，日落徐看倦鳥還。
久歷歲華宜老大，不藏丘壑亦蕭閒。
有懷欲就東陽賦，文藻誰如康子山。

遊善興寺

峨眉山外即長城，斥堠無驚秋氣清。
黃葉擁山飛殿角，

青烟出樹隱鐘聲偃松岌葉雙蛟舞流水玲瓏萬玉鳴
莫道遐方多寂寞五雲咫尺是神京

簡黎惟敬直閣兼懷梁柱臣中翰

抱病經旬獨卧家故人咫尺似天涯愁添鬢改霜生鏡
歲暮心驚雪作花白日看雲飛桂海青藜然火直金華
清宵只隔宮城月悵望西南五色霞

再過寶塔寺

禁城西畔舊禪房松檜陰陰日轉廊隔院靜聞棋子落

垂簾深護菊花香
祇緣帝里紅塵擾
始覺空門白日長
兩度經過留不得
買山猶自愧支郎

人日集顧氏桃花館同集者黎惟敬休承弟顧
汝和諸昆季也

喜逢人日轉青陽
燕賞桃花舊草堂
七菜漫隨時令設
一杯聊與故人嘗
東風早已回明庶
柳色行將繞建章
但得弟兄常聚首
不妨京國是他鄉

送休文弟之任吉水

東風吹水柳青青送爾遙從吉水行
薄祿驅馳南北道
老年離別弟兄情
歸鴻已逐春先去
駕馬猶餘櫪下鳴
別後相思何處是
五雲應接鳳凰城

玉河春色

春半京華盛綺羅
冰消太液長新波
燕巢香壘依金殿
柳拂流澌出玉河
細草生烟晴日麗
煖雲吹雨落花多
春光流轉須臾事
且向樽前一浩歌

清明大雪因憶十年前亦是日下雪蓋北方常

事南人則未之見也

清明大雪亂紛披十載曾逢合更奇
點綴杏花紅艷色密封楊柳壓新枝
寒侵繡幄冰重見月冷瑤臺露下遲
說與南人應不信區區莫怪夏蟲疑

袁魯仲改官南部詩以送之

子向留京非避世余慚北闕尚貪名
兩行新柳誰為折千里歸人已有程
心逐去旌隨夢遠酒傾離恨共愁生
還家正是春三月一路看花到石城

清虛山 即鬼園

青霞片片玉玲瓏
員嶠方壺指顧中
喜見平林遊白鹿
驚看激水噴蒼龍
香生別殿玄都近
雲護高臺碧落通
春盡飛花猶滿地
分明身在蕊珠宮

韋園秋集贈劉君

帝京塵土滿征裘
此日城南得勝遊
昨夜微霜初墜葉
芳原爽氣肅清秋
輕風吹酒通仙界
落葉催寒出御溝
直擬韋園作韋曲
中山況是最風流

蒙恩賜襲衣

朝罷鑾輿下玉墀臨門駢錫自天垂
唱名頒給依金水叩首親承出鳳池
未媿桓榮稽古力獨憐顏駟遇時遲
歸來雲錦生茅屋默坐時歌湛露詩

仲中翰處賦蓬萊閣上仙得長字

木天清切久徊翔麗藻承恩侍建章
每自含香歸第晚時因退食廣筵張
春風拂檻花枝繞燕子窺簾柳浪長
要識仙凡原不隔瀛洲何似帝城傍

浴芳亭

永夜池塘暑氣清
綠陰圍合午風輕
新篁弄影知魚樂
疎柳飛花聽鳥鳴
日轉空庭茶正熟
涼生虛枕夢初成
致齋三日全無事
夜夜清言坐月明

陸原大書舫清遊卷

不繫身如汗漫仙
左圖右史米家船
白鷗飛盡青天杳
讀到南華秋水篇

題折枝桃花

折得桃花拂袖香美人含笑立東牆無言亦自成蹊逕
解語爭教不斷腸

題芭蕉士女

雲鬢冰肌態橫生瑤階瓊砌照人明午窻夢醒渾無事
閒看芭蕉獨自行

予既和履吉八絕因思湖上四時之景有不減
此者摘其可愛更賦二首

朝霞明滅起來遲爽氣氤氳獨立時紅日未昇湖水淨

五雲翻映碧琉璃

飛霞散綺日欲落須臾星斗生光芒鳴榔何處漁歌起
欸乃先聞餘韻長

鷓鴣林八景詩為趙都諫賦

鳳凰山高挿天青鳳凰山下雲冥冥雲消雨歇總無迹
疊疊烟嵐虛翠屏

皚皚白雲擁龍峯萬壑千巖在畫中買得新醅開小閣
褰幃正對玉芙蓉

春來馬足漲桐溪
片片飛花落岸低
自啓柴門閒倚杖
靜看新水浴鳬鷺

荻花飛盡晚蒼蒼
月照陂塘秋露涼
碧霧漸消光漸滿
悠然一曲和滄浪

春雨

春雨陰陰十日餘
苔封曲徑掩精廬
泥深門外無車馬
自向山齋理舊書

四月

我愛江南小滿天
鱖魚初上帶冰鮮
一聲戴勝蠶眠後
挿遍新秧綠滿田

飡霞樓為周羽士賦

霏烟五綵倚樓明
吸盡瑤華禮太清
夜靜時聞環珮響
天風吹落步虛聲

夢中題朱竹

淇園一雨洗塵埃
忽變朱顏破綠苔
春夜珊瑚映燈火
丹山赤鳳下瑤臺

獨坐

雨過空庭白晝明
虛齋獨坐聽流鶯
春風不道官衙冷
依舊青青蔓草生

春雨書懷

十日春陰不裹巾
喜看庭際綠苔新
山齋聽雨惟高卧
忘却門前問字人

文嘉

字休承

春雨憶孔加

濛濛細雨集洗滌此幽林
虛館絕塵想緬然懷同音
綠草已盈砌芳醕聊自斟
欲往限南北褰裳畏泥深
人生豈有涯歡會當及今
無由寫耿抱撫事獨沉吟

贈徐中洲

徐市求神仙入海竟不返
蓬瀛渺雲濤相望歲華晚
中洲海上來眉宇青天開
手持白羽扇笑上黃金臺
羊裘客燕冀出入王侯里
長揖公卿間飄飄紫雲起
北渡黃河津洛陽多故人
終然無所遇歸卧西湖濱
西湖茅屋

冷自吸丹砂井明月下青松照見蕭蕭影振策吳市遊
相逢正清秋無人識梅福長嘯空悠悠何須魯連子世
事皆如此生計五湖烟功名一杯水拂袖赤城虹相思
何處逢儻騎雙白鹿招我五陵東

採蓮詞

搖棹若耶津紅粧映水新歌聲何處起愁殺採香人共
入荷花去隔花聞笑語擊槳濺紅裳同來採蓮女秋水
灘灘碧荷花渚渚香蕩舟莫擊楫沙上有鴛鴦雙雙採

蓮女各各有春心
誰歌竹枝調春心
應更深朝朝採蓮
去暮暮採蓮歸
朝暮空相守
思郎心欲飛
採蓮復採蓮
花盡恐傷藕
撥棹出花去
女伴爭前後
舟中採蓮女
岸上遊冶子
兩意暫相窺
無由得雙美
妾欲向花語
花應對妾羞
溪花與溪女
相妬幾時休

送顧小川典籍使代還朝

星槎八月迴閭闔
九天開暫弭吳門
楫同啣江上杯
滄洲吾尚困青瑣
爾真陪自悵風塵
侶還憐霄漢才
清秋

楓葉赤離思杳難裁既愁津樹遠復恨逝波催他時相憶處明月照疎梅

追和元雲林俛徵君江南春詞

三月江南薦櫻筍鵲鵲鵲迴塘靜蛛絲紫空網落花雲母屏寒浸嬌影簾外沈沈春霧寒綠蘿欲覆花間井泥金小扇障紗巾畫橋紫陌踏芳塵林花開遲水流急江鴨對眠莎草濕吳姬如花花不及摘花笑映溪流碧楊柳烟籠萬家邑柳下王孫為誰立幽渚泥香生綠萍

閒看梁燕壘經營

湘江有懷

湘江湘水深如許
隔岸佳人隔花語
語罷月明秋滿天
斷續猿聲何處所
旅魂夜夜到鄉關
覺後相思仍楚山
幾番欲買君王櫂
愁見湘姬竹上斑

明日

明日復明日
明日何其多
日日待明日
萬事成蹉跎
世人皆被明日累
明日無窮老將至
晨昏濛濛水東流
今

古悠悠日西墜百年明日能幾何請君聽我明日歌

送崔德卿北上

寂寞一杯酒送君千里行郵亭不折柳上苑好聞鶯
崔君少年不得意骯髒江湖弄煙水晚將經濟入承明
歛見風烟五雲起吳王城邊秋雨晴長河八月波濤平
丈夫晚達君莫恨今日朝廷重老成

石橋別

愛此白石梁況對橋上月携手素心人而於此中別歸

來明月還照我光濕瑤階露華墮
疎鐘不鳴偶回顧嚴城層層已深鎖

寒山寺

春尋古寺幽相與話前脩
名豈寒山得詩曾張繼留樓
鐘虛夕照橋影急河流尚恠石龍柱
擎雲勢未休

泛長蕩

孤舟穿葦去水薄動寒沙
水鳥時集樹村羊晚到家
浮游波上梗飄泊浪中花
惟有青山色依然一道斜

與友人釣魚

曠野煩襟豁青天素月流不因同二阮那復此奇遊
磐石偶余契絲綸亦漫投平生釣竿興隨地可消憂

與子元長卿月下訪道園上人坐月白齋

乘興扣禪關蕭然水竹間路危應九折屋住只三間
齋白月懸鏡花明菊破顏茶香解留客深夜不知還

水逢故人

萍逢得故友水宿感烟波笛起關山弄杯停子夜歌
竹

深防卧虎江近有鳴鼉興劇渾無寐翻嫌月色多

首夏寒玉亭有懷伯起

春去綠陰成猶聞春鳥鳴雨滋庭草色風度壁琴聲靜裏流光轉愁中白髮生偶來成獨坐念爾若為情

贈陶見塘邑宰

望裏塘非遠悠然紫翠橫水禽飛不定春草夢中生茗
雲溪流潤江臯峽浪平近聞消息好花滿錦官城

華補菴服闋北上分得春草自應知

春草自應知春風送客時
可堪南浦恨愁詠北征詩
水遠花飛急天長鴈去遲
迢迢江漢意芳杜不勝思

樂野

吾慕樂野子蕭然與世違
青林玩流水白板掩柴扉
雨過知花落風晴看鳥飛
閒來鋤菜甲為採北山薇

送湖廣族人還

吾宗有賢秀迢遞自衡來
遠道兼程發孤舟隔歲回
江潭雙目送春渚亂雲開
我亦思先德無由掃綠苔

贈朱鎮山

君有經綸志今為廊廟材風烟鎮山在竹樹野堂開
隱几浮蒼靄搗書映紫苔蹊塗茅塞久煩與闢蒿萊

善權洞

石室山人去不返亭亭一柱玉當門飛流恍聽雷霆鬪
怪石虛驚虎豹蹲梁帝斗壇荒草積十仙題字古苔昏
聞道潛通三萬里幾時騎鹿看眞源

張公洞

福地眞傳霹靂開
仰空虛竇看崔嵬
千盤磴道穿深黑
萬古仇池接往來
頗怪洞中常見日
翻從地底一登臺
聳身忽自厓間出
回首仙源悵草萊

婁江

婁江流水渺蒼烟
無限晴波滿目前
冉冉時看鷗鷺下
悠悠疑與海天連
風濤隨處喧行客
舟楫還能濟巨川
我欲因君泛溟渤
乘槎直到女牛邊

縹緲峯

縹緲峯高幾千丈太湖隔絕欲登難風烟每向詩中得
秀色今從畫裏看石洞幽玄林屋杳巖嵐層疊莫釐寒
杖藜何日捫蘿上萬頃平臨縱大觀

望廬山

長夏艤舟謝子港正見廬山水面橫隱隱香鑪浮紫翠
茫茫彭蠡蕩虛明雲烟誰辨東西寺道路空懸去住情
三日船頭看不盡茲遊眞足冠平生

峴山懷友

暮春三月鳥關關乘興來登湖上山碧浪差差浮翠藹
紅樓隱隱結蒼鬟已無蓮宇荒筠外猶有窪樽蔓草間
莫訝臨風倍惆悵故人何在獨躋攀

月夜同友人登盤門城

盤關自昔雄吳郡與客攜壺次第行孤塔岌嶸撐碧漢
萬山迴合繞秋城河流隱映星初見雲樹依微月倍明
取醉但酬今夕興升沈莫問古今情

奉次伯起有懷之作

春山隱隱澹脩眉，綽約丰姿映雪肌。
聲度曲中楊柳恨，行移月下牡丹枝。
絕憐公子頻中酒，況復蕭娘最愛詩。
別後驚魂殊不定，可堪連夕雨絲絲。

初歸志喜

歸來三徑未全荒，拂拭重開舊草堂。
隼几淨揩明似鏡，硯池新浴燦生光。
客來親戚情多悅，老去詩篇意不忘。
莫道歸遲遲亦好，猶勝終老滯他鄉。

題陳道復畫

襄陽墨瀋未曾乾
十里瀟湘五尺寬
樵斧不禁苔徑滑
漁蓑長傍水雲寒
澄澄僧眼連天碧
澹澹蛾眉隔霧蟠
恐為醉翁當日寫
平山堂上雨中觀

嚴子陵釣臺

崔嵬絕壁映江開
落日停舟上釣臺
清節已看垂萬古
客星何意動三台
林間冉冉青松滿
烟際飛飛白鳥來
莫向風前倍增感
古今名跡幾蒼苔

靈谷寺

帝京雨過氛埃淨下馬來參第一禪松徑入門猶十里
袈裟布地已千年誌公寶塔金身在道子長廊粉墨全
雲氣常凝陵寢近閒看白鹿下蒼烟

彭思菴絕粒百餘日矣茲將登岳陽樓過吳言

別題此為贈

羨君絕粒事清脩袖拂紅塵隘九州東泛已輕楊子渡
南行期上岳陽樓逍遙欲棄人間世浪跡真成汗漫遊
我亦採真元有意相攜何日到瀛洲

詠趙雪林燈帶

細剪冰紈疊浪輕
縈絲繚繞雪英英
霜凝雲母瑤花亂
水浸玻璃玉片平
白燕舞風憐綺袂
素娥乘月撫銀箏
瑤臺此夜真如到
不向龍宮夢水晶

登瓘山絕頂

展遊遂上瓘山巔
登頓危崖鳥道懸
沃若川原紛曠望
清連湖水共澄鮮
圖經誰辨千年後
往哲空懷百代前
惆悵偶來還即去
無由獨往住蒼烟

南巖

幽人北築碧山下草堂正傍南巖開烟霞時從几間落
雲氣每向窻中來倏然東籬採蓮去倦矣西澗攜書回
何當日暮一矯首芙蓉削去高崔嵬

和吳射陽帝京樂

秣陵自昔好秋光風落天芬滿路香雲月家家搖彩筆
烟花處處鬪紅粧畫船競泛秦淮水寶馬爭馳蹴鞠塲
莫道近來彫散甚笙歌日日醉重陽

陳氏園次韻再送子任

風裊垂楊枝弄柔城闌偶集野堂幽已過佳節愁芳會
又續林燈作夜遊杯色盈盈滿樽酒歌聲嘒嘒隔花喉
武陵桃源花正好此去君應無別愁

送門神次石田先生韻

衡門執戟兩閒兵澆酒逢除漫爾榮四序相隨如有戀
一年同住豈無情幾因風雨銷金鎖不為馳驅損赤纓
自古功成身合去肯將流落怨時明

次張伯起韻

偶向溪邊共繫舟
風烟隨地得同遊
雲開圖畫千山秀
雨歇銅棺五月秋
踪跡飄搖疑梗漫
菴坤浩蕩與身浮
莫言樽酒論文事
煮茗焚香事更幽

寄吳半溪

荆溪溪上碧烟虛
最愛吳髯水竹居
半畝清池堪引釣
一窻疎影礙臨書
每因月出常穿徑
幾為花開少住車
回首風烟秋欲暮
題詩問訊近何如

羽客載茗

路出華陽遠冠猶碧玉低輕舸載茶具送我過荊溪

滕王閣

帝子久寂寥江花自開落我來讀殘碑流雲掛虛閣

清湖洲

清湖洲上草痕青沙水流成八字形萬古波濤終不改
舟人指點說寒汀

蕉石軒

太湖石畔種芭蕉
色映軒窗碧霧搖
瘦骨主人清似水
煮茶香透竹間橋

桃源圖

偶然避世住青山
不道移家便不還
却怪漁郎太多事
又傳圖畫到人間

雜題

空江木落思悠悠
閒傍蒹葭弄小舟
一段清光君獨占
底須回首羨輕鷗

山齋

山齋雨坐漫焚香
几淨窻明竹樹涼
午睡起來無一事
自翻殘墨寫瀟湘

贈承天理上人方池

高僧住畔有方池
片片慈雲映碧漪
長日誦經臨水坐
鳥啼花落不曾知

送月泉上人還荊州承天寺

兀兀春寒睡起遲
叩門來索月泉詩
吾師欲了西來意

月在青天水在池

夜渡湘水

瀟湘一望白雲長
梧葉蒼山似故鄉
月色滿空聞夜漏
漁歌幾處徹秋霜

無題

桂枝風冷夜悠悠
皓月呈空五彩流
莫怪停砧不能寐
從來閨閣怕逢秋

送劉玉橋北上

歲晚江空岸草枯故人舟楫向皇都相逢不盡相違意
寫得天寒欲雪圖

石倉詩選卷四百九十九

欽定四庫全書

石倉歷代詩選卷五百

明 曹學佺 編

明詩次集一百三十四

黃省曾

艷歌行

南山有喬松，高高凌紫虛。
東枝蔽朝景，西幹匿流暉。
大 中明堂材，巧匠不可圍。
萬歲未裁用，棄置此岑隈。
梁棟

質虛在公輸骨已灰鳳鳥巢其巔駟麟亦追隨窮谷固
荒寂車馬倘來歸一朝就繩削宮闕增光輝

折楊柳行

青陽帶芳堤歲歲成枯彫黃枝被嚴霜忽復攀春條草木
有再榮素髮無還毛相送入玄夜白骨捐山郊平生華堂
燭不復燃明膏委形非吾有百年乃徒勞安得駕遊鸞碧
漢追王喬軫念良已久口燥朱涸焦發邁求神仙裝辦何蕭
蕭芙蓉蔽行渚秋雁鳴已飄時哉不停軌黃鶴詎可招

扶桑篇

亭亭扶桑枝東掛滄海日揚條拂閭闔流輝轉天術神
鸞戲芳柯玉女採瓊實仙人結飛觀丹霞盤石室輕舉
襲霓裳潛棲撫朱瑟陽溪攜桂酒碧窻理金帙王喬遊
並軀洪崖談接膝靈風引騰蹻朗月照高逸鍊比龜鶴
齡悲爾蟪蛄質千秋控景光壽與天地畢

有女篇

有女清揚婉佩服麗且妍獨夢錦衾牀嘆息寶鏡前玉

指弄秦箏皓齒啟朱顏仰遏紫雲飛幽思竟何宣念彼
睽攜子攬涕何漣漣鴻高鯉沈遊芳訊不可傳

銅雀臺

鳳蓋已云謝蛾眉空自過川徂終莫返陵望欲如何紫
嶠違看舞黃壚不聽歌君恩如可憶雙玉灑漳波

銅雀妓

金駕闕松門青臺秀色存鳳絃流曠幕蘭酒上虛樽怨
涕揮陵氣芳情逐帝魂總學巫山女終絕九原恩

置酒高堂上

醵鼓及蘭辰鳴儔款契賓縟雲生意藻芳醴動顏春燭
華遲晝短聲妙奪歌新莫令青歲歇庭內詠他人

麗媚曲

佳人年十四吹氣勝蘭香一曲庭花落餘音繞杏梁龍
綃纏紫袂錦帳掩明粧若非琥珀珮焉得動君王

詠四皓

黃公偶園公綺里並角里一出秦庭中共入高山裏白

雲卧丘壑紫芝歌川汜漢氏求羽翼冥鴻復來止

東方朔歌

虞淵濯紫泥丹丘飲黃露枯樹化飛龍路傍跨蒼虎海上逢青童桑間謁王母神馬來芝田麒麟攀漢武碧草獻一枝夫人寢中覩同登含烟舟木蘭為棹櫓因說九景花根移吉雲土復陳聲聞木一汗經千古綺牕論五雲白間撒燈火玉人出玉壺青雀飛青瑣他年辭帝闕獨泛蓬萊舸

李夫人歌

漢家武皇帝愛殺李夫人蛾眉向黃泉龍顏動悲辛偶
泛翔禽舟赤日方西傾雲慘昆明池風激牽牛津妙曲
搖帝筆哀蟬勝陽春羅袂悄無聲玉墀生素塵虛房空
寂寞落葉依霜扃清歌發皓齒左右皆沾巾命點龍膏
燈因進洪梁酒滿斟文螺卮紅顏出纖手飲罷卧延涼
夫人來其傍脈脈無一語但授蘅蕪香寢回對明月淒
然痛欲絕如何琥珀枕奇香猶不歇欲覩如花容此願

那能滅乃告李少君歷歷肝肺陳樓船浮暗海青石懷
潛英千人升紫雲四五歸皇庭十年得一石刻似夫人
形置諸紗幙中顧盼宛如生遂祀靈夢臺朝夕通精誠

句曲歌

句曲西漢日三茅初來賓歛忽及東晉二許復懷真同
為吞玉客俱作瀛臺賓我來探靈迹桃李華陽春雲輶
不由地焉得逢其人青青九陽松虬枝浮金菌亭亭左
紐栢蒼然依玉晨攀崖久徘徊覽古白日顏顧此空山

房陶君留夜臺因思麗譙客兼懷校書才感激無所歡
仙山明月來

遊句曲山最幽處

松栢入靈地飄飄思玉容登山日氣滿花雲知幾重道
人抱靈鼓仙謠巖上逢願言採瑤草此處求高蹤

至黃山

舟行逸興起日出羣動分欸然黃山至蒼翠鬱氤氲翩
彼高枝鳥斗嘯巖上雲野叟指予言西有公侯墳荆棘

無時已孤兔何紛紛耕者侵為田泉下無所聞徒然金
匱裏紀載平生勲嘆息不成歡惻惻歸江濱

登堯峰山寺

拂霄陟堯峰緣崖興何逸輝輝翠微上猶懸堯時日湖
上七十峰朝與雲相出道遙古松下遊行趣非一原中
陰色殊潭間鳥飛疾天籟流梵空香氣暖僧室忽生稅
駕心頓使殷憂失

泰伯廟

古廟臨河口凋落無丹青
泰伯遺四海蕭條居此庭
清風何時息日月共千齡
拜揖冕旒下鑪上烟冥冥

晚眺靈巖山

吳王有綺閣昔日館蛾眉
一旦繁華歇千春使我悲
不見採香徑已無翫花池
落日洗綠苔青山拂殘碑

錢塘江西興買舟至鏡湖宿

橫江初沿洄海色遂盈目
浮天吐靈潮連山動虛陸
古來流無際此中含萬族
雲霧合騰傾陵巒互魏伏
欽灝

波相踰噓喻勢何速翔陽舒千里未久起扶木颯然天
風至吹我暮春服抵崖見飛鳥衆羽皆肅肅乘暮發西
興明月鏡湖宿

瓦屋山歌贈高公

通平辭會稽遠接峨嵋月攀踐謁天皇受之五符訣丹
成餌龍虎玉霄度年劫道陵鶴鳴中服氣冠芙蓉精誠
格孝子皓髮來相逢祕錄煉光景歛起雲臺峰自古食
霞人寄跡在雲島仙令左縣彥窺探紫書早蜉蝣視塵

世軒珪一何小少登五鳳樓雙鳬下長洲橫琴嘯白日
把酒思丹丘抗懷無心雲對客如虛舟灑然厭羈諠選
勝求瓦屋萬里青天西清虛隔人俗珠樹浮層阿瑤芝
藹深谷於此構金房命侶營河車蘿牕桃李枝春風易
成花他時遵三山談笑隨洪崖伊余隱吳門素心本同
調待遊五嶽餘得泛瞿塘棹願結蓬海盟攜手瀛洲道

晨江

晨江驚蘭櫂絡繹凌衆山流攬澄明色芳華彌遡間肯

酒命嘉肴靈丘一以攀新睇盪高踪與集娛幽般抗志
青雲表翔遊方未闌

答祝京兆希哲見懷二首

玉體養微疴蘭日忽當暮行藥陟清園桃李芳已度羲
曜仰西馳浮雲邈難駐玄運駛以催安不念朝露曠虛
存友生咫尺憶情素遐思遡唐虞高踪結尼父美人沒
西方渭水孰能顧瑤言把幽懷五嶽愧遲赴努力在金
匱青冥願蠅附

又

弱歲愛靈仙朱館攀茅君果然值霞客授訣異所聞此
言不尋常謂是瑤池文當時返廬山欲希上士勤懷寶
十餘年足下無青雲向長畢婚嫁隱居揮典墳緬追洪
崖步獨覓王喬羣此志倘終遂千秋遺世氛

贈三際上人

蓬萊牟子國釋者有高秀早入不二門禪枝蔭海岫常
懷古今人思與靈境遘秉錫為方遊始駕秦淮舟寶誌

謁靈谷華林竟何求遙探普陀跡孤蹤赴明州潮音巉
巖洞乘濤忽而至持爾慧鋤心恍惚逢大士天台五雲
長歸途指仙鄉把月坐瓊樓餐霞留石梁臨安訪天目
滄溶兩湖綠空明蕩煩囂清猿伴孤宿竭來止吳門百
花寓幽刹趺觀表法幢真宗開頓篋春風三月時緬憶
清涼處萬里探五臺往接文殊記清舸泝芳川日弄桃
花樹

送表弟王曰俞之武岡州岷王府

吾聞桃花源渺在都梁州子行往探之啼猿引仙舟吳
門一片月已掛瀟湘秋英王得賢幕揚裾鳳凰樓訪古
金城山銜杯紫芳洲若有王喬興丹砂應可求

贈別草陵山人

南方一黃鵠抗志在蓬崑舉翮青冥上哂彼雞鶩樊曠
覽翔四海擇對鸞鸞言秋飈吹盤遊落我桃花源宣歌
肺肝粲辰調風雅騫聽之再三羨可與泗夏論不差阮
家貧芝薇薦壺樽尋渡越水深還鄉翳文園聊鼓高山

音天際送孤翻

採菊

金穹動涼颼白露已秋滴衆花悉潛翳中林正岑寂仙
城九光霞散為籬間色鍾子賦有遺陶翁未兼覲堪為
王母弄嘗給羨門食吾欲餐落英攜壺一攀摘

冬日夙興舟行至婁門田廬

整冠宵燈微雞聲動隣樹出門霜盈瓦理棹月在路蒼
茫露魏城決渚翻羣羽日出縱顧曉青松誰家墓寒空

蕩明豁澄江早迴
汴冉冉稅田廬
蕭條草間步

樓上對月

圓靈澄水鏡
白露暖秋城
影動闌河迥
光含竹樹清
絃桐陽阿曲
彈處不成聲
對此素娥色
其如紆軫情

閒居多暇因集漢魏以來英哲高唱命曰詩言
龍鳳書既成喜而有作

華銓炳往籍
千載玩斯須
因得披先詠
雲日互光奇
嘉餐沆露英
潔把瓊瑤枝
芙蓉映松篁
種緒各有宜
遐思

宛可得苦抱吾其知刪述羣龍才無忝萬代垂借問言
何似皓月明秋池寄語揮毫子騁駕毋多岐

箏詠

趙女弄秦箏霞紈爛結束丹絃悽且清玉柱一何促芳
意托宮徵陽春宣妙曲嬌鳳跼金堂鮮雲駐華屋紅顏
況可餐窈窕若瓊玉歌轉蘭氣流聲斷有巧績纖指亂
悲音娥眉向我蹙深情雖未言逸響展衷腹千金不足
酬碧蘿懸喬木

登李白酒樓

浮雲引客思為我西南流
酒樓春風生逝者中泉遊
今朝綠蟻盃不到黃狐丘
當年若弗寤白髮徒生愁
我攜鸚鵡來笑無高陽儔
鳳鳥不銜圖皇皇棲孔丘
且吟王喬篇寄與瀛臺洲

錄南湖發尋景德精舍經樵李下

朗然始湖介任覽迨靈宇
解纓極玄討緩策謝塵伍
新景既暘接初雲亦幽取
照物均遣縛臨芳盡增撫
去國

感人與遵林愜教父代情歡若揮理抱戚如吐霞篁跡
吳舊烟莽諮越古往圖眩今陟空文寓前譜涓名俗所
矜徂運疇詎數嗤彼高騁徒危累自何苦

寓大石佛院綠竹北軒

矯仲偃岷室禽慶謁名嶽勅事澹無役行泥何不樂暖
春振霄褐岩境躡雲屨性冲駕奧林神夷選清壑于此
綠篁陰乃有金園閣南湖晃縈滴北嶺迤綿絡霽懷對
禪解玄心弄鳥雀萬物覽參此一得觀並作息宴頓遊

轡琴書聊爾託

繇段家堤步至孤山上

少有巖壑性翹旌不可移心駭雲臺宅願逸霞林居晨
興詠適軸春賞下招提凌湖散幽趾屬島登青梯今栽
非昔萼新宮仍往基峙瀾出中浩列嶂環衆竒蕭森側
虛隴高尚企襟期玄陰錯澄流朱緯雜芳吹龍盤天海
愜鳳謝爵羅宜景爾徵士蹤寫唱感踟躕

月夕挈酒湖畔寓目

逸體貴行和閒趾悅佳就澄舒光始半華條滋兆茂乘
暉謝燭秉頌德引杯奏寂謐輟空籟微冥曩朝秀際嶼
霧浩屯彌湖星朗覆靈皋寫長堞淡水影羣岫妙志不
遑寧玄覽從茲究理等昔豈往神遐今非後懷玉聊自
娛委鳥詎云謬載詠前哲言身聖超宇宙

度棲霞嶺戾止烏石峯禪居

靈扉瞻五覆紆嶺邁三沓既矚遠川繞亦盼近山合泄
瀉盡幽泛度鳥舉清谷聞此絕世岑棲有息心衲即聳

構彌樓於奧締香榻惠日清照臨慈雲滂吐納巔巔玉
林映巖巖翠屏匝煩想靜流滌朗詠自摘發

入大慈山飯虎跑泉精舍

崖行多優游穹曜但亭午倚撫心不厭跼蹐意增愈疏
甸分花應層阜別雲吐疲足休給林澄心投象宇濛瀉
淙瑤瀨隈隅麗丹廡七覺啟幽扃一道界盤塢不謂此
山椒乃有彼岍侶芬縕瞻戒香絡繹會宗語法供豈世
調靈餐異塵脯往牒稽聽龍昔泉酌跑虎一謳傲自足

萬細何足數

並南峰後攀風篁嶺酌龍井泉覽神運片雲二石
旭輿繚金灘晨塢采綠闕寥閭靈異鄉荒昉遯淪轍穹
林隱天崇紆澗灑流折巾屨都澹清耳目亦瑩徹樵升
攬英顥萃止軼埃盞風篁佇新鬱龍泉飲古堞蕭樓始
一躋妙石得雙閱霄中仙掌抗霞裏片雲揭跡閱丹鯉
藏事往銀簡滅恨不總羲轡處此玩恬悅

自石屋洞至法相寺

性分各有極修意江湖上採藥仍景臺顓老迺希向披
情樂林草夙駕遨雲嶂陽岫方緬觀陰崖載虧望壁闕
時悚怖洞闔恣登降覺路馳訪蹤開士禮趺相形忘躬
有耽理止神非喪承泉代綆汲託基排壘剏安道志豈
渝興公懷自亮沈冥常內足高寄無所讓

發潮音樓峻嵯西越永清塢獅子峰上

晞阻謂有窮訊高云可達翦削何當上冥昧且茲發天
表既排度山野遂侈濶新禪宅窈窕古隘際閭闔闔松莽

非人寧芝秀有真掇聳嵯愕四矯潮江眇兩匝緯帶萬
畛殊烟雲千里合歸乘中谷風蕭條感林岷

東昌途詠

程雲歷綿邈傳河沂盤折歸思日搖蕩芳樹轉層疊繡
羽異園聞鮮萸豈欄擷所翫非故鄉馳心詎可歇來方
季裘寒旋已齊紈熱車龍促前晷鏡鳳長新雪理藥無
端倪循膚有瘁竭雖御金樽酒不解愁腸結

金昌亭宵集贈別張維靜田汝成二方伯

經時賁虛館河上理章素外身謝有營洞物寡所慕惟
飈冽已寒林曦愛當暮車馬歛云集蓬蒿睇情故出郭
展報悰遵艦投訪步舊儔叔夜看新交巨源顧蕭衿暢
同披珠談歡競赴舉觴戀靚懷鳴琴念征路明發當雲
分中宵慨星聚芳意諒有諧存此慰離悵

送張吏部北上

薄遊山水都邁子玄朗器雖止攜把間矯接鳳鸞意高
衿挹彌冲淵談暢曷匱蘭蕙存素交緬藻緬清寄振翼

漸光朝握鑒佐衡治茂綸協要舉叔則肇芳譽始秋理
瑤鷁中吳展華覲當岐發眷想興詩抒離思

春日田園言懷三首

田廬動春色墟里連雞聲啟戶見旭日銜杯解朝醒桃
花倚牕開戴勝桑間鳴素烟泛新柳青山列虛楹蘭蕙
難久芳皓月不常盈百年若流電胡為而屏營

草木相凋謝春秋促年齡飛纓與白衣同一銷其形四
皓乃天士紫芝輕漢庭王孫儋人爵終然服青萍予觀

干祿者後今俱未停誰能江海上浩然獨揚舲

玉衡指春暮鷓鴣鳴以時此鳥自何來棲我綠楊枝
蕙蘭幸茲發愴惻朱顏移海內誰不逝予哀亦何悲

塘上行

朝慕陽臺雲暮羨巫山雨朝雲猶得薦枕席錦衾鳳裯
嗟獨處玉顏如花鑒明月長門綠苔不可滅夢中彷彿
羊車來寤起心肝摧斷絕瓌姿瑋態耀綺牕繡衣袿服
盛文章婉若游龍乘雲翔嗚呼不得侍君傍魯日返舍

秦雲不飛妾腸已斷君心未回朱戶幾攜鸞鏡泣春風
長繞玉階啼玉階翩翩逐雙燕蘭時同宿昭陽殿不似
龍顏從未攀年年歲歲能相見

惜日歌

今日日已去明日日復來誰將長繩繫六龍使我紅顏
常不摧芳花寂寂委綠苔吾人難免為黃埃殂落不問
帝王貴撤瑟豈管聖賢才軒轅几杖今安在漢家陵墓
昔已開仲尼往時慟顏回後來亦悲泰山頽嗟余生長

姑蘇臺不惜青錢釀酒杯
攜琴把釣五湖上醉來與日
同徘徊

雞鳴高樹顛

雞鳴高樹顛聲繞羅幃前
起視夜何其素月蒼穹圓
人生少小輕歲年芳鬢一縞
不復玄逝如東流川盡若秋
空烟卷衣出門歷海嶽願餐
靈藥為神仙黃山並數百
白日齊三千竦身綠雲中
控鶴升九天揮手謝鄉國攬
涕心茫然

六齡行效高適

六齡讀書近燈火垂髫開口談今古一畝鶯花不敢窺
四時筆硯常辛苦早望青雲轉手生狂期金印揚眉取
誰知坎壈三十年碌碌布衣猶拜俯後生坐見登紫庭
耆舊紛看下黃土遠志從人笑鴻鵠高才悔殺誇鸚鵡
世間富貴豈足論眼中齷齪何足數苟卿邑邑不逢齊
尼叟皇皇仍在魯身賤難辭官長輕數竒憤受庸人侮
五湖烟水托妻子海上清名榮父母意氣吾凌霄漢高

文章人比虹霓吐謝公曩昔起青山郭相當時發行伍
只恐蛟龍學未成不愁他日無雲雨

贈阮將軍本常

憶昔攀逢龍鳳會帶礪河山誓金匱放馬長洲垌草碧
洗兵震澤湖雲翠幾臨清瀨弄鷗絃每傍花林引鸞吹
莫訝將軍有嘯歌春空海上無烟燧

西小湖在林屋洞天巖石池畝許冬春不竭

蔡山居傍詩以贈之

翠壁高萬仞芙蓉搖太清絕頂開瑤池玉波常自盈咫尺日月華銀河與之并錦鯉漢間遊荷花天上生春風石髓流仙島紅顏服之不凋老我欲揚舲訪蔡經紫冥同拾金光草

贈魏公子徐京

中山王孫居雲子浮雲同駐吳趨里翩翩逸氣干紫雲榮華不值東流水五陵之豪豈足交折節來尋江海士赤松笑閉穹窿山方平正隱干將市齊雲樓前傾蓋逢

終日言談洗心耳別來幾時愁綠羅青鳥銜書下彤几
高歌燦爛五色霞鸞龍迴薄蘇臺紙再三展讀知爾心
昂藏常在蒼冥裏

江行早眺

春去夏來常水宿蒼茫萬里看朱旭山色遙開茂草碧
江流半是浮萍綠誰辭龍卧傍塵埃自笑鰲連釣溟曲
馬知足下無青雲不見雙雙舉黃鵠

蘇臺篇送郡倅周仲仁之京

姑蘇山上高臺古翠壁金楣映歌舞西施化作綵雲飛
空餘碧草生江許江山不改吳苑開使君褰帷紫馬來
錦席遙浮五湖棹仙輿屢上姑蘇臺黃堂撫字歡謠起
荀羨買臣差足擬下榻平交有布衣盈門徒走看朱履
平生讀書已萬卷少年作賦稱千里銷夏灣頭蓮欲芳
金昌柳色婀娜長翩翩綵鷁向何處聞道雙幡趨未央
朝天一日展駟驥應報三年集鳳凰

鐵瓶篇

仙人飄飄自何至紺髮方瞳紫霞氣金瓶貯酒醉枕之
玉山頽卧干將市時人不識謂凡流轉眼飛空那可求
鼓琴知坐白羊石吹笛應還黃鶴樓此瓶昔把玄丘去
至今猶記仙人處吳王宮西碧草春千年空自想飈輪
鳳凰臺歌送顧布政華玉之武林

鳳凰臺前動春草春風吹拂金陵道白鷺亭邊掛短楊
清溪閣上啼芳鳥吳中顧榮如謝公東山抗步紅霞表
花開綺岸延舉觴雲落清牕照揮灑去年予作秦淮客

新秋梧桐漢樓碧秦淮浮我鸚鵡杯明月六龍齊下食
江流東西別幾時帝為蒼生起安石仙舟過泊姑胥臺
相逢談笑明星夕臨川悠悠送君去祖餞傾城垂柳處
伐鼓揚旌遶武林天涯悵望桃花樹飄飄揖謝鳳凰臺
鳳凰青山湖上開鳳凰南飛五雲遠十一海郡皆春回
行看振羽高樓上御苑應歌鳳鳥來

送王子卿之金陵

憶昔武林時君家綠盃舉白雲如楊花拂灑紫空起高

堂淒清彈錦絃我吟鮑照瑤臺篇逢君意氣即傾倒別
時幾載心茫然閉門偃卧吳宮邊花溪忽遘王猷船故
人相對還相憐金陵去訪鳳臺跡三山眺落長江烟霜
飛九月不堪客歸來願及春風前

觀郡國迎春

青陽淑氣迎青野綵仗朱軒鬪驕冶紅粉先垂燕子簾
俠兒早泛桃花馬去年春望閭闔宮今歲相看人不同
總道芳樽邀綺日難將衰鬢染春風

五日追憶往歲客途

去年端午長淮道今年端午家鄉好異國雖開角黍杯
香樓競折菖蒲草五色絲盤續命文千金寶飾女如雲
追思作客胡為爾綠樹黃鸝不忍聞

石湖歌

涼日有佳興花江攜小舟邈然越來溪遠映青山流吳
天盡染紫霞色五湖浩弄蒼烟秋西施一日綠雲散笑
容千載餘荒丘繁華轉眼何足言人生適意須當年金

樽攬取洞庭月綠琴靜鼓高山絃從來一兩謝公屐常
在幽林大壑前

山姬行

山姬二八來我家鬢有青雲臉有霞身上曾無片羅綺
空令顏色嬌如花竹間蓬戶未嘗厭寶鏡蛾眉時自誇
向平若覓仙丘去載爾青山黃鹿車

廬山吟

我聞匡廬山西峙宮庭湖少讀神禹經昔為天子都背

岷南來幾千里魏峯秀出名香鑪石鏡孤圓照閭闔屏
風九疊開蓬壺盤霞錯日氣璀璨天雞紫鳳時相呼匡
君騰遊太清境空流碧漢青山影冬春不斷霜雪光晝
夜常看二輪景天池猶餘慧遠蓮山花宛種仙人杏長
風自昔吹二龍明月當時照三隱予也縈懷十載餘披
圖蕭爽心泠然行當騎鹿芙蓉頂長嘯支磯玉女前

秋日懷武林朋舊

我觀西湖日春水桃花流傾城羅綺踏芳草治子笙歌

喧畫舟青山一兩謝公屐雲霞日弄香林丘歡娛轉眼
亦無幾吳門忽已逢新秋羅牕卧疾理丹餌開門兩月
無遨遊良朋翹首苦相憶金杯不散胸中愁

華泉歌贈邊尚書

君不見峩峩名山華不注芙蓉秀出青冥間霓旌雷轂
竟何在石道空餘芝草斑綠雲萬古留不散赤松嘯父
來登攀蓬壺方丈去幾許仙人明月吹簫還銀河宛轉
落此山素琴日夕鳴潺湲鳴潺湲流不已千年若待邊

夫子幽懷不減鹿皮翁
漱酌瓊瑤紫霞裏
玉醴頻餐體骨輕
紅泉一嚙容顏美
曉障常銜鸚鵡杯
春風獨泛桃花水
憶自飜飛入帝城
辟蘿恍惚千巖清
翠澗勞思照野服
靈波屢夢沾塵纓
迢迢回首山中樂
解道王喬事堪學
笑騎神鯉問滄海
坐聽天雞倚東嶽
鳳苑猶歌李謫仙
金門尚隱東方朔

紫芝行寄孫一元

孫子具清觴邀我坐
秋日幽庭青蔥桐
樹枝翠華涼風

轉蕭瑟酒酣浩歌情益歡紫芝煌煌攜我觀樽前空餘
再三把霞色雲枝屢欲餐岩岩五嶽龍莖長飄飄不久
蘿衣往鹿皮之子諧我心靜掇靈柯發孤想朱顏俯仰
玄鬢消坐憶丹丘驂鳳鑣瓊篇昔謝茅君授他日相思
弱水遙

閭遠

吳王宮南一畝居中林日與高賢俱相逢不惜解貂飲
春風共倒花前壺鶴客頻嫌紫霞晚山妻却笑青錢無

仲尼有玉且不售何必營營求爾沽

新楊柳四首

新楊柳新楊柳絲絲盡掛文園口芳鳥空啼碧玉枝青
樓不見紅顏婦柳新人故愁奈何忍對楊花歷亂多去
年此日垂楊下憶汝春宵共踏歌

香階草香階草蕙葉蘭花綠閨好怪爾春風作艷陽吹
噓不管人枯槁昔年陳草今復青昔年佳人歸杳冥獨
憐留取羅裾色暗結愁思亂廣庭

綃窻月綃窻月三五匆匆易圓缺往歲常懸兩地心今
春忽照千年別窈窕歡同月下杯翠翰紈扇幾徘徊清
光不復佳人對永夜孤飛度綠苔

雕梁燕雕梁燕年年歲歲常相見簷下猶垂芳草簾鏡
中已歇桃花面平生雙處似雙飛訣沒離魂不再歸是
處逢春添綺麗偏予閨閣減芳菲

榻上

短榻吟還可幽居眺得兼燕迴花淡淡蝶泛草纖纖遲

日難過屋輕雲不滿簾所歡能到此明日共須淹

壬午對鏡

寶鏡照顏色不回桃李春因思少年日如作夢中人此
去化無已後來看豈真飄飄出塵氣難與映麒麟

南星別業樹藝覽記勝之書

少小愛桑麻農書凡幾家圃栽常抱露池步屢逢霞青
粉衣沾竹紅烟醖媚花山圖還種藥不遣鬢生華

枕上聽雨

簷頭滴九月枕上聽孤燈木葉沈多少霜鐘鳴未曾故
茅初識漏新穀忽愁升嘶馬門前過令人感夙興

山妻以老子拔白日去予皓髮

非關畏遲暮非欲鬪芳年祇恨春風日翻無碧草妍玉
絲金鑷斷仙訣美人傳且待還丹後當回寶鏡玄

白髮

鬢以從衰白年華荏苒過舊知愁畔長今信客中多青
鏡翻銷綠芳春不上和唯餘壯心在看劍意如何

張儀部觴予朝天宮西山道院

綠殿枕丹丘，珠臺啟宴遊。
雨飛仙觀午，雲入冶城秋。
青鳥臨杯語，長江抱席流。
國華偕上彥，西日任淹留。

皇戚邵子招飲西山

藻景鳳城隈，迢迢引翠臺。
朱輪隨徑歇，芳宴逐林開。
天酒椒宮下，文魚禁籞來。
戚侯多意氣，一霽野人懷。

宴萬都閭宅

曠別歡求友，張樽武烈家。
翠沈芳樂李，紅剖雉亭瓜。
鳳

嶺浮炎藹龍城吐夕霞枕經兼妙算鮮爾握高牙

宴張戶部高士軒遲月分韻

爽澹郎官宅銀河瀉不隄同遲一片月各就五言題露
竹搖秋緯風堂響曙雞主人真愛客不覺醕如泥

同謝少南徐霖宴魏國東園

竹把瑤樽愜山登紫屐宜玉漿催鳳俎紅燭繼龍曦月
是金堂照風為錦幙吹勝情猶未已移席向芳池

宴友人園

涼月始臨仲園亭啟宴來客逢皆舊好花對即新開江
鯉為林饌朱霞趣客杯秋風彫柳色何得管中催

陳園三月之宴

翠苑韶華麗綃衣物候和春花催夏放夕鳥換朝歌杯
綠承芳草筵紅接絳河平生掩窮巷情為辟疆多

朱陽館步至陶隱居墓傍

福地長謠罷陽春窈窕遊花深朱陽館栢古玉晨樓石
頌今猶在龍芝何處求白雲持不可嶺上自悠悠

八月八日泛石湖

山氣帶烟浮湖波納雨流
林梭鷺織曉天字雁書秋
禮石叅靈象停機並女牛
彌空縈柳色隨處接芳遊

禪興寺梁公子墓

梁日乘龍第當時舞鶴歸
沁園開施果明月掩容輝
玉匣藏金苑秋雲護夕扉
吹簫人不見猶憶鳳凰飛

予遊牛首山大司馬喬公餽以法酒兼命武士導之夜宿僧舍

雨徑探雙洞雲房酌兩泉牛頭吟古寺兜率醉高天夜
榻留僧梵春巖受客眠應知西省客懷我紫霞邊

楊相國送酒金山寺泛舟大江登妙高臺五雲

朝陽閣吞海亭飲中泠泉

一片迴波石何年梵剎開江流萬古去濤帶六州來釋
子呼鼃起山人指鶴回洪瀾須不作荀羨在高臺

蘭亭

人世有生滅江山無古今千巖猶秀色五月始登臨自

到流觴處因生秉燭心
吾遊亦陳迹回首動悲吟

丹徒留侯廟

留侯有遺廟幽枕碧江潯
偶此白雲謁猶欽黃石心
椒漿秋一奠松子我將尋
明月下孤棹蒼蒼楊柳陰

泊舟支硎經靈巖遊赤山夜珠塢

林麓轉秋清花村間嶺成
遙尋赤山奧言就白雲生
霞塔留吳殿烟墟辨越城
人間不貴寶何用夜珠明

水宿溪上

移舸含山宿推蓬向月停
蘼蘭盃夕氣蟋蟀枕秋聲
野詠神襟王羅袞夢寐清
忽聞歌子夜江上蕩遊情

登來青軒

峻閣標靈嶂盤迴翠岫連
佛香雲和裊天燭斗齊然
萬色雖看界諸空悉露禪
道林調白馬於此業青蓮

游駙馬山莊

貴主闢靈扉黃村倚翠微
星榆當子牖天柳拂孫磯
寶馬迎花立金樽款客揮
碧臺明月裏常度鳳笙飛

采香徑

繚繞湖山上君王昔藝香年年二三月女伴掇芬芳
簞佩含風遠蘭心逐水長千秋餘綺徑寥閭帶川陽

玉泉寺

散趾遵蘿徑張筵俯玉津
來憑仙石瀨暫板客車塵
靈鳥如聽法文魚不避人
吾儕修禊所奚減洛川濱

靈隱寺

一殿臨飛鳥諸禪麗擁山
層層琴咽水處處碧成關
是

景遲春眺屯雲待客攀美人餘歲月信宿不知還

望虎丘

故苑返長洲輕舸過虎丘塔懸無隱樹雲映不藏秋香
逕紅蓮浦金亭紫霧樓自憐為客久翻覺似初遊

張灣發舟

驅馬別長安言遵潞水干初於駕帆日即起近家歡吳
日懸歸思燕雲送旅餐王孫芳草綠隨路得行看

新開曉行

征子戒晨雞津人鼓閶闔綠流沿翠鷁紅日起青堤汶
上山相接師庄水漸低長天芳草岼猶使客心迷

溧水步至觀堂假宿

秋水理歸棹徒行向溧陽林愁紅日盡山苦白雲長客
影隨他騎鄉心過野芳喜看村館近聊得舉孤觴

盛子攜酒城中為宴

中丘無俗鞅多爾問荒塗海嶽人孤蹈蓬蒿宅半蕪詩
唯百一就酒乃十千沽月代東城客西飛送夕艫

種竹

綠竹何年植蕭森翳碧林琴邊嵇宅滿酒畔習池深月
與澄秋影雲來助夕陰長歌吾一倚忽起鳳棲心

送蔡師古客武陵

日照峴山古雲歸襄水濱青青洞庭草千里引遊人崔
井酒初熟桃源花又新羨君人代裏江漢得垂綸

七夕送程子

自得黃山客追隨青眼稀如何人北去翻值雁南飛遠

道開秋色長河混日輝
夷門歌舞好那可廢思歸

送皇甫子循黃州推府

迢迢邾子國此地擁朱輪
言携吳苑藻去賦楚江春
赤壁雲霞古香壚氣色新
倘過湘水上應憶弔原人

秋日蔣子携樽過草堂宴集

蔣翊携樽至招尋覺爾賢
暑殘蒼竹徑秋入白雲天
小飲過涼鳥高吟及暮蟬
杯深雖酩酊愛客敢求眠

七夕

獨帳成雙室雲河作雨川鏡宮逢夕啟梭宇會宵眠燈
九歡相照針多巧競憐淒鏘天漢曲偕鳳入離絃

九日五更起坐不寐

簷雨午宵歇室燈涼燄明寢興將百念蟋蟀聽殘聲老
態閨人識新歌候物成雞鳴催九日一感佩莫情

閏二月金昌亭眺集

九十半芳辰江山淑靄新文舟交謠女寶馬競遊人綠
滿蘼蕪甸香浮杜若津欲留桃李色特與兩重春

嵩嶽

太室登封地言携寶鏡求雲笙過子晉星鶴下浮丘石
髓春杯服仙牀夜枕留箕山知不遠兼得訪巢由

華嶽

翠壁五千仞山經昔所論不愁攀鐵鎖深欲倚雲門日
月雙崖照星辰萬壑翻修羊懸石榻時嘯洗頭盆

恒嶽

玄嶽留青塞迢遙未得攀虎風吹桂綠龍月照芝斑棊

石春臺靜琴空暮嶺閒
毋禽煩報語行覓雁門關

長安答左舜齋

我浮長淮棹君駕太行車
紅日不辭遠金門來獻書
綠樽邀叔夜明月報相如
芳草燕臺路歡求意有餘

憶華玉顧公

憶昔遊京國秋風逢顧琛
試言青瑣客誰似白雲心
對面松桂氣聽歌山水音
不知千里駕何日訪嵇林

詠月

北塞為愁色西宮作怨明
却來南斗下幽動野夫情
蛟海思吹笛鸞丘欲放耕
望舒煩一駕宜並客懷清

七月六日江燕

春燕今猶見江干語並飛
不知秋未半何事影全稀
故主辭偏早新雛引欲歸
浮生看去住自有淚沾衣

題樊駙馬山池

昔日吹簫地波分太液池
星如臨女度月似影娥移
魚在依王藻鶯來拂帝枝
平生懷上善觀俯叶衿期

讀襄陽耆舊傳

宋玉陽春富龐公隱德深猶存楚國調尚見白雲心躡
跡人何處遺安我所欽昔賢成片紙歎息倚花林

東臯草堂為倪令賦

駘蕩溢蘭澤流芳轉碧林野含雲氣暖江引日華深紫
洞蘇門嘯桃花五柳琴春風吹玉宇一賞艷陽心

題會稽山房

安道會稽隱栽花傍嶺棲羅交禹簡壁桃湛蠡城溪俗

遠孤雲似藏深蔚豹齊囊中看綠字一卷洞天題

哭李公獻吉

往歲楊園餞涼風七月樓不言躬再拜為別淚雙流雁
引鄉河遠霜催旅鬢秋黃泉何底急令我泣藏舟

除夕讀真誥

凌霞孤興當除夕縹緲靈蕪鑪上焚嬾倒山樽浮栢酒
靜開真誥誦苔文青天鳳駕他年事翠島龍芝何處分
佩鏡懸符遊句曲清宵獨坐想茅君

池上室左小兒栽有新竹社中諸君數數過之
池上栽成竹一區涼雲不斷蔭相俱人逢子敬停花屐
客勝公榮弄酒壺自喜平生嘉跡似共誇終日鄙言無
揮毫拂素休辭酌近有南鄰足典沽

山亭下鷗鷺

玉鷺霜鷗湛羽儀雲波日映泛參差清湍啄蔓尋常見
碧渚羣遊何所思霧擊風搏那可得江妃素女自相隨
乾坤秋色孤亭暮對汝悠悠動遠悲

竹下晚歸恍有月色

臨池坐檻弄霏微著屐扶筇竹下歸
雪路香生風撲面
烟空雲漏月沾衣
清狂戀友宵行國
傲散耽遊晚叩扉
鳥雀何緣棲亦暮
投林尚有一羣飛

舟中覽金陵攜歸古鏡

金陵古鏡新所將孤舟覽之情內傷
青年欲付逝波去
華髮漸隨春草長
玉顏一代照多少
菱花千古常輝光
篋中留取伴明月
他時訪嶽載雲裝

虎丘

山人放棹金昌郊
虎寺銜杯蒲筍肴
衆嶺盤迴赤日動
千林駘蕩青霞交
接離倒著紫巖下
如意清揮翠壑坳
遠公蓮社我將入
烟堂石室新誅茅

又

擊汰春江吳榜齊
高人笑拂青雲梯
紅日真成紫霞照
珍禽亦作丹丘啼
坐來碧石自為侶
登行明月猶堪携
玉壺流連不能寢
閨寥半夜聞天雞

吳令蘇允吉過訪草堂有贈

仙令彈冠東魯賢五湖雲日鳴花絃
玄珪玉操蒼黎暮明遠青文海嶠傳
却扇風生翠庭轉停車雨色朱空懸
山厨聊出芳容饌拂塵高談及暮天

贈朱太宰懋中

太宰仙臺早挂纓栽花漉酒寄高情
門廬不改齊嬰卜塗巷皆知司馬名
大雅合稱金殿首高標爭羨玉壺清
自慚獨步非王粲降德忘年倒屣迎

杭中丞惠歷

臺使忽從三徑至，歲書遙自五雲來。
江湖又覩青陽始，梅柳難禁白髮催。
紙上流年悲往夢，隴頭耕候喜新開。
山中甲子無勞問，且向桃源醉客杯。

賦苕溪草堂和孫太初韻

翠竹嬋娟傍野潭，秋山日映草堂寒。
雲枝桂樹臨虛榻，翡翠山雞照碧湍。
漫學赤鬚求茂苑，久携青劍隔長安。
時時野服乘高興，採藥吞芝歌遠巒。

春陰

朝霞不帶綠烟堤紫殿輕雲壓苑低芳柳嬌鶯藏宿霧
碧蘭初燕拂新泥宮花未見仙階影獵騎虛聞錦路嘶
開幌山河佳氣滿氤氲彩翠望中迷

虎丘詠

芙蓉近倚闔閭城眺閣觴樓逐勢成珠寺翻為歌舞地
青山盡是綺羅情巖花吐學紅粧麗谷鳥啼兼鳳管聲
十里垂楊芳草畔四時常映彩舟行

哭祝京兆希哲

嵇康懶性老還疎
孫綽才峰秀有餘
世上不知司馬賦
人間今寶右軍書
從來燕雀爭嘲鳳
可惜蛟龍只混魚
尚憶去年春二月
碧桃花下駐高車

金山

圓嶠長江裏
攀遊拂斗槎
潮吹香殿草
泉閱寶林霞
四集帆檣色
中盤日月華
龍宮開法藏
鰲界出蓮花
矚海紅樓複
沿濤紫蹬斜
不須三島問
宛爾入仙家

淮陰謁漂母祠

曩昔淮濱母王孫一飯將鑑如君子哲義有大賢方溪
壑哀龍淺風雲感鳳驤千金終以贈寸念本難忘草澤
憐誰解英雄困乃常漂亭餘落日楚劍失秋霜墓與黃
塵古祠同綠水長憫窮人口播報德簡書光慷慨叅遺
像清酤薦紫芳

宴王繩武玉峰草堂

愛爾金門彥為家倚玉峰曠區真特涌百里此維宗在

昔傳名岫于今擅美封氣靈園羽異山秀苑華穠作沼
通崖液開堂寫嶂容旭春卿靄積霞晚紫輝重梵塔標
池影仙樓表宅蹤臺疑登鳳鳥城似入芙蓉卧榻成遊
具閒居足眺供平生泉石興于以策雲筇

送黃山人遊武林

言命嵇生駕錢塘訪物華香街接垂柳綉戶雜銜花剎
映湖中寺帆停海上槎帝鄉今異古姬館客猶家山自
城心起江於闕背斜奏杯應瀉月振策即凌霞嶺樹時

妨蓋園鶯不避葭桃源倘沿棹歸定武陵誇

白石精舍為蔡子木題

昔有仙靈者呼之白石生為年錢務上餐液夏周更世
往山猶在糧餘洞得名中郎稱國彥精館倚巖成桃夾
宜深水芝幽可掇英雲華隨藻筆巒響荅金聲溢液膏
流滿瓊瑤草樹縈作臺邀少女標宅待方平麟脯行將
饌鸞漿會此傾曹疑秋署皎人並玉堂清知守存時與
溜磷遡孔情正登紅藥選先有赤松營意緬蘭為宇詞

芳桂結楹何時携寶鏡來討五霞城

顧中舍壬辰之冬直文華殿書顯靈宮碑而郎

館有雁集未幾承御筆題銜之寵若先徵焉

索賦此詠

何許長安雁翩其下紫氛一歸金殿客永斷玉關羣德
羽霜階戢祥音月郎聞隨陽承日彩為字寫天文卿異
常投嶽賓行每在雲美休徵淑鳥殊錫兆華雲閣候惟
龍近池恩與鳳分帝歌瞻舜爛神藻挹堯芬寶燭皇輝

被仙杯法酒醺長携五色管供奉聖明君

明妃詠

淒訣翠華宮言歸異域戎選圖才易與驚貌美無同絕
代留長恨黃金失至公影遲隨北馬聲咽羨南鴻魄玉
銷胡月顏花殞塞風思違春不到愁亂雪偏濛夢國多
逾切懷鄉久益濃蛾殘香減黛桃落粉凋紅毳幕魂孤
寓琵琶拍自通淚懸青海上啼盡不流東

來鵲樓為張令文宿賦

言從山水會清構聳瑤虛遂有王風鵲來巢君子居銜
條經始並占歲肇祥初棲月飛華棟鳴風向綺疏荀家
鳳集後魯令雉馴餘崑圃遊翩爾雕陵感晏如還疑王
喬鳥于此汎金除

哭張子言

髫歲陟文園懷鉛早峻翻棲身蓬作宅抒詠藻成言國
彥要芳締朝紳愛綺論醉鄉虛綠酒窮巷傲華軒作客
賢人聚平生處士村賦金憐自擲德鳳惜無鵞山壑常

飛鳥王侯不輟轅四愁隨白髮三徑接青門去害能調
馬遊冥已化鯢在吳欣把臂客冀狎同樽草覓黃香巷
花求平子垣道親披對屢心賞和酬繁露也朝何速蓀
乎夜莫援往秋猶寓雁今日忽傷鵑桃剩沿源思雲留
訪嶽魂御溝琴水咽河表劍霓昏遙展生芻奠哀衿為
兩煩

挽杜隱君敬心

念爾玄遊者平生傲散衿巖棲遵隱躅帷下宅書林八

索鈎觀妙三餘撰討深開闢芳草色遺世紫霞心石髓
思餐古源桃欲覽今跡孤山處屐情至竹間琴煉藥年
何晚歸泉候易侵積家憐有德貽子羨無金此後蕭條
徑籃輿不復尋

悼無塵禪師

紅界起閭提洲輪夢影齊七城開秘軌三草茂神萑有
釋持幢鼓無修絕徑蹊緒禪唯室閉蘭誦止山棲世出
延香教真歸入妙倪院生功可內方去業堪西樹鳥流

音威堂雲障色悽踊空軀已變往湛性何迷逝水傷金
澗遺風景綠梯欲知超化跡詠取嚮終題

古意四首

桃花花自紅杏花花變白豈郎有兩心花作兩般色
燕雛不可飛柳短那堪折轉眼謝蘭春日暮花如雪
珀枕芙蓉獨芳帷翡翠空聊將雙黃鵠飛我綠琴中
君夢妾不知妾夢君不識安得兩夢偕相逢皆此夕

詠雁

秋落衡陽月春鳴塞上霜往來年歲改南北海天長

詠合歡黃葵

接葉深為翠雙葩淺作黃因憐合歡意紗幕覆鴛鴦

詠垂絲柳

翠柳拂金堤絲絲綰霧低挂來鄉望遠垂處客心迷

塞上曲

八月秋深邊馬肥塞魂空逐雁南飛蒼茫落日黃沙外
猶自提兵鬪合圍

大將新懸銅虎符
迢迢青海走單于
雕鞍坐踞渾無事
天濶秋鷹正可呼

放獵胡沙控紫弦
草深狐兔走祁連
秋空昨夜旄頭落
為卷旌旗破左賢

塞雪皚皚春未消
將軍千里破天驕
羽書昨夜飛金闕
應得君王賜紫貂

楊柳詞

千載姑蘇送客時
金昌亭畔柳如絲
于今一樹無人種

怕與春風管別離

白馬金羈人未回
翠條仍自挂粧臺
黃鸝莫作藏身處
一入絲中遣不開

巫峽巫山錦樹春
垂楊垂柳著行新
東風不是貪飛絮
為覓天涯未見人

金陵樓上

我在金陵百尺樓
秋河高映玉杯流
若教明月家山度
為寄長安此夜愁

至天津

天津渡口海潮生
遠樹微茫片月明
帆影初收芳草岼
金錢買酒直沽城

吳歌

金鋪玉戶散烟沙
露徑風墟吹遠霞
尚憶吳宮全盛日
錦帆西子擁如花

綺門紅日八風開
天象文移江海隈
一泛五湖君子甲
館娃花閣掩雲苔



石倉歷代詩選卷五百